

Dumonda Ruckstuhl concernent las quotas dal UFAS

Per mintga uffizi chantunal da la AI fixescha l'Uffizi federal d'assicuranzas socialas (UFAS) finamiras da quotas. Las finamiras da prestaziun prescrittas per l'onn 2018 sa cloman per la gronda part dals uffizis da la AI: Tegnair u sbassar las rentas novas, tegnair u sbassar il dumber total da las rentas da la AI sco er tegnair u sbassar ils custs per persuna assicurada. Talas finamiras da prestaziun èn ordvart problematicas en connex cun l'assicuranza d'invaliditad. Finamiras da quotas han per consequenza che l'assicuranza d'invaliditad n'examinescha betg pli dapertut avertamain, da tge prestaziuns ch'ina persuna assicurada ha il dretg. Pervia da talas finamiras da prestaziun s'establescha entaifer ils uffizis chantunals da la AI ina cultura problematica che stat en cuntradicziun cun las directives da la legislaziun davart l'assicuranza d'invaliditad.

L'assicuranza d'invaliditad ha l'obligaziun legala da conceder d'ina vart a tut las persunas assicuradas quellas prestaziuns, da las qualas ellas han il dretg tenor lescha, e da na conceder da l'autra vart naginas prestaziuns, da las qualas ellas n'han betg il dretg. Finamiras da quotas stattan en cuntradicziun cun quest princip. Perquai supplitgain nus en quest regard la Regenza da responder las suandantas dumondas:

1. Ha il UFAS defini finamiras da prestaziun cun l'Uffizi da la AI dal Grischun? Sche gea, co sa cloman quellas?
2. Co exactamain vegni mesirà e controllà, sche las quotas en mira vegnan cuntanschidas (pertschients, posiziuns decimalas e.u.v.)? Vegni examinà correspondentamain, sche finamiras na vegnan betg cuntanschidas?
3. È la Cumissiun administrativa vegnida orientada davart las finamiras da prestaziun ed èn questas finamiras relevantas per la strategia da l'Uffizi da la AI dal Grischun?
4. Vegnan las collavuraturas ed ils collavurats da l'Uffizi da la AI dal Grischun infurmads davart las finamiras da prestaziun? Sche gea, co vegnan ellas ed els infurmads e vegnan ellas ed els orientads cuntinuadamain davart il stadi da las cifras ch'èn actualmain relevantas?
5. Tge capita en cas da conflicts d'interess? Èsi legal, sche collavuraturas e collavurats d'in uffizi da la AI refusan ina prestaziun per cuntanscher la quota, malgrà ch'il dretg da la prestaziun è evident? Sche betg, a tge serva lura il sistem da quotas?
6. Tge tenuta ha la Regenza envers la pratica dal UFAS da fixar finamiras da prestaziun cun l'Uffizi da la AI dal Grischun?
7. Co giuditgescha la Regenza il conflict / dilemma per las collavuraturas ed ils collavurats da l'Uffizi da la AI dal Grischun tranter l'adempliment da las finamiras da prestaziun dal UFAS d'ina vart sco er il dretg da prestaziun ed il princip d'inquisiziun da l'autra vart?

Cuira, ils 11 da favrer 2020

Ruckstuhl, Hitz-Rusch, Alig, Atanes, Baselgia-Brunner, Bondolfi, Brunold, Caluori, Cantieni, Casutt-Derungs, Cavegn, Caviezel (Cuira), Cramer, Degiacomi, Deplazes (Cuira), Deplazes (Rabius), Derungs, Dürler, Epp, Fasani, Favre Accola, Florin-Caluori, Gartmann-Albin, Geisseler, Hofmann, Holzinger-Loretz, Horrer, Hug, Jochum, Kienz, Kohler, Kunfermann, Loepfe, Maissen, Märchy-Caduff, Müller (Favugn), Natter, Niggli-Mathis (Grüsch), Paterlini, Preisig, Rettich, Rüegg, Rutishauser, Sax, Schmid, Thomann-Frank, Tomaschett-Berther (Trun), Wellig, Widmer-Spreiter (Cuira), Wilhelm, Zanetti (Sent), Spadarotto, Stieger